

# 哈密志卷之一

天文志一

分野

夫庶徵衍九疇占星之權輿也故未及乎分域自周禮保章氏主九州皆有分星則職方太史之掌統而爲一抑或又聞保章氏之言曰分星以觀妖祥其與易賁之象曰觀天文以察時變其義所關鉅焉今陝西西安府屬秦秦又屬古禹貢雍州之域井鬼分野

謹按天文志其舊九州分野之書既亡而十二國分野之說多屬附會自古分野皆爲中原定以九州之內而外夷不與焉今甘州肅州哈密等處古屬西羌西戎之地自古未列於九州之數考之諸書皆未載紀今亦不可強而附會既知未確亦不可妄載愚謂惟以地行里數合計今平涼府寧夏一帶尙然分野仍屬井鬼宿位自應以西安府至哈密里數爲證距哈密四千四百三十里以地行二百五十里爲應天上一度乃有所據合計十七度有奇而至哈密即爲哈密之分野也余不知其確不敢直然贅入惟將陝西省分野繪爲圖式載之其井鬼宿西北或居某星之次或居某星之首或左或右或遠或近度數多寡不能指出而分野篇中僅以地行里數推測而上應天天之宿度似覺得其確因余有所疑誠恐蹈於附會姑且闕之

